

*Kakanj, 27.09.2017. godine
Broj: 533/17*

**ZAPISNIK I ZAKLJUČCI SA DRUGE
SJEDNICE PREDSDJEDNIŠTVA SKUPŠTINE SAVEZA
OPĆINA I GRADOVA FEDERACIJE BOSNE I HERCEGOVINE**

Dana 27.09.2017. godine u Kaknju je održana Druga sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza su prisustvovali:

1. Hamdo Ejubović, načelnik Općine Hadžići i predsjednik Predsjedništva Saveza;
2. Ivan Vukadin, načelnik Općine Tomislavgrad;
3. Branko Bago, načelnik Općine Posušje;
4. Muhamed Ramović, gradonačelnik Grada Goražde;
5. Marin Radišić, načelnik Općine Čitluk;
6. Nermin Mandra, načelnik Općine Kakanj;
7. Edin Hozan, načelnik Općine Jajce;
8. Tajib Muminović, načelnik Općine Teočak;
9. Dragana Solaković, po ovlaštenju gradonačelnika Grada Sarajeva;
10. Osmo Babić, po ovlaštenju načelnika Općine Centar Sarajevo;
11. Šerif Kaljicković, po ovlaštenju gradonačelnika Grada Cazin.

Pored navedenih, sjednici su prisustvovali i: Faris Hasanbegović, predsjedavajući Skupštine Saveza, Mirela Bubalo, predsjednica Komisije za međunarodne veze, saradnju i evropske integracije, Majda Ganibegović, UNDP, voditeljica projekta „Jačanje uloge mjesnih zajednica“, Vesna Travljanin, direktor Saveza, Zlata Turkić, viši saradnik za rad sa skupštinskim komisijama i institucijama vlasti, Šejla Hasić, viši saradnik za projekte – projekt menadžer, Amir Kupusija, viši saradnik za projekte – projekt menadžer, i Selma Fišek, viši saradnik za pravna pitanja.

Hamdo Ejubović je pozdravio prisutne i zahvalio se Nerminu Mandri kao domaćinu Druge sjednice Predsjedništva Saveza.

Nermin Mandra je pozdravio sve prisutne i zahvalio se rukovodstvu Saveza što je Kakanj izabran za domaćina Druge sjednice Predsjedništva.

Hamdo Ejubović je predložio Dnevni red sjednice kako slijedi:

1. Zapisnik i zaključci sa Prve konstituirajuće sjednice Predsjedništva Skupštine Saveza općina i gradova Federacije BiH
2. Konstituisanje komisija Saveza:
 - 2.1. Komisija za razvoj i unapređenje lokalne samouprave
 - 2.2. Komisija za međunarodne veze, saradnju i evropske integracije
 - 2.3. Komisija za izbor i imenovanja
3. Izvještaj sa javne rasprave Saveza o Nacrtu zakona o koncesijama
4. Inicijativa HDZ – a Bosne i Hercegovine (Gradski odbor Tuzla)
5. Informacije:
 - 5.1.a) Informacija sa 23. redovne sjednice Predstavničkog doma Parlamenta Federacije BiH
 - 5.1.b) Informacija sa nastavka 21. redovne i sa 13. vanredne sjednice Doma naroda Parlamenta Federacije BiH
 - 5.2. Informacija o projektima UNDP-a na kojima je Savez partner
 - 5.2.a) Informacija o Projektu integriranog lokalnog razvoja III – ILDP
 - 5.2.b) Informacija o Projektu RELOAD
 - 5.2.c) Informacija o Projektu „Jačanje uloge mjesnih zajednica u BiH“
 - 5.3 Informacija o Nacrtu izvještaja za Bosnu i Hercegovinu - Pregled sektora upravljanja čvrstim otpadom i Preporuke o reformi sektora i ulaganjima u sektor
 - 5.4. Informacija o Projektu „Uspostava opservatorija za decentralizaciju u regionu“
 - 5.5. Informacije o porezu na dobit po jedinicama lokalne samouprave
 - 5.6. Spisak poslanika u Parlamentu Federacije BiH iz jedinica lokalne samouprave
 - 5.7. Sastanak Radne grupe za Zapadni Balkan pri Komitetu regija Evropske unije
6. Tekuća pitanja
 - 6.1. Inicijativa „Refresh Production“

Predsjedništvo Saveza je jednoglasno usvojilo predloženi Dnevni red.

- 1. Zapisnik i zaključci sa Prve konstituirajuće sjednice Predsjedništva Skupštine Saveza općina i gradova Federacije BiH**

Predsjedništvo Saveza je jednoglasno usvojilo Zapisnik i zaključke sa Prve konstituirajuće sjednice Predsjedništva Skupštine Saveza općina i gradova Federacije Bosne i Hercegovine.

2. Konstituisanje komisija Saveza:

2.1. Komisija za razvoj i unapređenje lokalne samouprave

Zlata Turkić je izvijestila da je održana konstituirajuća sjednica Komisije za razvoj i unapređenje lokalne samouprave i da je zabilješka sa sjednice dostavljena u materijalima. Naglasila je da je za predsjednika Komisije izabran Miroslav Lucić (Općina Domaljevac-Šamac), a za zamjenika predsjednika Aldiana Kavazović (Općina Stari Grad). Istakla je da je Komisija usvojila Poslovnik o radu, te raspravljala o Prijedlogu pravilnika o prekomjernoj upotrebi javnih cesta, te da su samo Općina Usora i Grad Zenica dostavile primjedbe na isti, te naknadno Općina Stari Grad. Predložila je da se primjedbe na Pravilnik pristigle iz ovih jedinica lokalne samouprave dostave Federalnom ministarstvu prometa i komunikacija.

Hamdo Ejubović je istakao da je rad komisija jako bitan jer je konkretan i u njemu učestvuju stručni ljudi tako da se od njih očekuju konkretni rezultati o pitanjima koja se razmatraju.

Predsjedništvo Saveza je jednoglasno usvojilo Zabilješku sa sjednice Komisije za razvoj i unapređenje lokalne samouprave uz zaključak da se primjedbe na Prijedlog pravilnika o prekomjernoj upotrebi javnih cesta pristigle iz Grada Zenica, Općine Stari Grad i Općine Usora dostave Federalnom ministarstvu prometa i komunikacija.

2.2. Komisija za međunarodne veze, saradnju i evropske integracije

Mirela Bubalo je, u svojstvu predsjednice Komisije za međunarodne veze, saradnju i evropske integracije, informisala Predsjedništvo o održanoj konstituirajućoj sjednici ove Komisije. Istakla je da je na konstituirajućoj sjednici komisije izabran predsjednik Komisije, a da je izbor zamjenika predsjednika ostavljen za narednu sjednicu. Informisala je o sastanku Odbora za Zapadni Balkan u okviru Evropskog komiteta regija koji je održan u Briselu 31.05.2017. godine čija je tema bila integracija zemalja Zapadnog Balkana i problemi na tom putu iz ugla lokalnih zajednica, a kojem su prisustvovali načelnik Općine Novi Grad Sarajevo Semir Efendić i gradonačelnik Grada Zenica Fuad Kasumović.

Predsjedništvo Saveza je informisano i o održanoj XII Generalnoj skupštini NALAS-a, koja je održana od 17.-19.05.2017.godine u Beču.

Predsjedništvo Saveza je jednoglasno usvojilo Zabilješku sa sjednice Komisije za međunarodne veze, saradnju i evropske integracije sa zaključcima kako slijedi:

- **Zadužuju se Vesna Travljanin i Mirela Bubalo da do iduće sjednice Komisije pripreme informaciju o tome koje su nacionalne asocijacije NALAS-a članice Unije općina i gradova turskog svijeta - TDBB.**
- **Također je potrebno pripremiti informaciju o tome kakav je odnos Nacionalne asocijacije gradova Turske i TDBB-a.**
- **Zaključeno je da se korespodencija dostavljena Savezu vezano za poziv LDA (Agencije za lokalnu demokratiju) iz Mostara za sastanak u Briselu, 12.10.2017. godine, na kojem bi, eventualno, prisustvovao g-din Han, komesar za proširenje Evropske unije, prosljedi Farisu Hasanbegoviću, načelniku Sanskog Mosta da procjeni potrebu prisustva sastanku. Sastanak će biti održan u toku sedmice lokalne samouprave na temu podrške i finansiranja LDA organizacija.**

2.3. Komisija za izbor i imenovanja

Zlata Turkić je ukratko izvijestila o održanoj konstituirajućoj sjednici Komisije za izbor i imenovanja navodeći da je za predsjednika ove Komisije izabran Armin Čavrk (Grad Goražde), a za zamjenika Dragan Galić (Općina Žepče).

Predsjedništvo Saveza je jednoglasno usvojilo Zabilješku sa sjednice Komisije za izbor i imenovanja sa zaključcima kako slijedi:

Predsjedništvo Saveza je verifikovalo prijedlog Komisije da predstavnik Saveza općina i gradova Federacije BiH u Sektorskoj radnoj grupi za Sektorski planski dokument – konkurentnost i inovacije lokalne strategije razvoja za reviziju i pripremu planskog dokumenta za period 2018. – 2020. godina bude Šerif Kaljiković (Općina Cazin).

3. Informacija sa održane javne rasprave o Nacrtu zakona o koncesijama

Zlata Turkić je informisala da je Savez organizirao javnu raspravu o Nacrtu zakona o koncesijama po zaključku sa prošle sjednice Predsjedništva. Napomenula je da su jedinice lokalne samouprave isključene iz predloženog Nacrta zakona o koncesijama. Naglasila je da je na javnoj raspravi bio prisutan veoma mali broj načelnika, odnosno gradonačelnika. Predložila je da se uz zaključke sa javne rasprave Domu naroda Parlamenta Federacije BiH dostave i pojedinačne primjedbe pristigle iz jedinica lokalne samouprave.

Hamdo Ejubović je istakao da je kroz rad radne grupe bio angažovan na izradi prethodnog Nacrta zakona o koncesijama koji je bio povoljniji za jedinice lokalne samouprave, ali je on stavljen sa strane i krenulo se sa izradom novog Zakona koji nije dobar za općine/gradove.

Nermin Mandra je naveo da je suštinska primjedba to što nije predviđeno da jedinice lokalne samouprave mogu biti koncesori. Dodao je da se općine pitaju za izdavanje urbanističkih saglasnosti gdje općina može staviti veto na određene koncesione postupke. Kao drugu bitnu primjedbu je istakao način raspodjele sredstava od koncesione naknade, naglasivši da je potrebno imati diferenciran pristup po ovom pitanju u zavisnosti od toga šta predstavlja trajnu devastaciju resursa, a šta ne, pa u skladu s tim odrediti i procenete po osnovu raspodjele sredstava od koncesione naknade. Naveo je da je nakon usvajanja zakona potrebno izraditi pravilnik kojim će se regulisati raspodjela sredstava po osnovu koncesione naknade. Istakao je da su zaključci sa javne rasprave dobri. Naveo je da ima smisla i da tražimo da se Nacrt povuče iz daljnje procedure, a ako ostane u raspravi sigurno bi morao pretrpiti mnoge izmjene. Takođe je naglasio da je zakon jako široko postavljen i da bi se moralo mijenjati više zakona da bi ovaj bio provodiv npr. Zakon o javnim nabavkama, Zakon o javnom prevozu itd.

Hamdo Ejubović je istakao da su u skladu sa ranijim Zakonom o koncesijama općine davale saglasnost na predmet koncesije koji se nalazi na njihovom području, a novi Zakon propisuje samo davanje mišljenja i da to predstavlja dodatno omalovažavanje općina.

Edin Hozan je postavio pitanje da li nakon usvajanja nacrtu ići u popravku prijedloga ili je nacrt skroz loš, te istakao da treba riješiti tu dilemu. Naglasio je da se neke stvari koje su u imovini općine, uopšte ne trebaju davati pod koncesije (npr. stadioni). Takođe je istakao postojanje kantonalnih zakona o koncesijama i naveo je da i to treba imati u vidu.

Ivan Vukadin je istakao da smatra da se treba pustiti da se ovaj Nacrt razmatra i na Domu naroda Parlamenta Federacije BiH. Naglasio je da treba insistirati na rješenju koje je predviđeno u kantonalnim zakonima o koncesijama gdje općinska/gradska vijeća daju saglasnost, a ne mišljenje na predmete koncesija.

Nermin Mandra je naglasio da je percepcija predlagača ovog zakona veoma široka i da prevazilazi oblast prirodnih dobara kao predmeta koncesija.

Muhamed Ramović je istakao da se ne uvažavaju stavovi Saveza i lokalnih zajednica, te da

moramo nastaviti i dalje biti aktivni i složni kod stvari koje su nam u zajedničkom interesu. Zamolio je da ubuduće naš glas bude jači kako bi nas parlamentarci morali uvažavati.

Dragana Solaković je uzela učešće u diskusiji s ciljem da pomogne tehnički kao pravnik i istakla da zaista dolazi do devastacije prava lokalnih zajednica. Naglasila je da se Savez treba oštro usprotiviti ovom Nacrtu zakona o koncesijama uz navođenje zaključaka sa javne rasprave.

Edin Hozan je istakao da bi zaključke sa javne rasprave trebalo poslati i Vladi i Parlamentu Federacije BiH (na oba doma). Takođe je naveo da načelnici trebaju prisustvovati sjednicama klubova stranaka i sjednicama klubova naroda u Parlamentu Federacije BiH.

Vesna Travljanin je navela da je zaista potrebno ojačati procese lobiranja u postupcima donošenja zakonskih propisa. Istakla je da je potrebna jedna sinergija u radu, te da je potrebno da se načelnici/gradonačelnici obavještavaju o sjednicama domova i klubova u Parlamentu Federacije BiH, ali da se na iste i odazovu. Podsjetila je na značaj Zakona o principima lokalne samouprave u Federaciji BiH i Evropske povelje o lokalnoj samoupravi. Dalje je istakla da je prijedlog Slavije Šućura, delegata u Domu naroda Parlamenta Federacije BiH, vezano za Zakon o šumama, da radna grupa Saveza zajedno s njim pripremi amandamane (primjedbe) na Nacrt zakona o šumama.

Nakon rasprave u kojoj je istaknuto da je Savez održao javnu raspravu o Nacrtu zakona o koncesijama, da je Predsjedništvo Saveza razmatralo ovaj zakon i zaključilo da on ne odgovara interesima lokalnih zajednica jer im je oduzeo prava i iste potcijenio i omalovažio, Predsjedništvo Saveza je je jednoglasno usvojilo sljedeće zaključke:

- **Tražiti od Vlade Federacije BiH i od Parlamenta Federacije BiH da se obustavi daljnja procedura usvajanja Nacrta zakona o koncesijama, odnosno da se isti povuče iz parlamentarne procedure.**
- **Zaključke sa javne rasprave Saveza dostaviti Vladi Federacije BiH i Parlamentu Federacije BiH uz zahtjev da se predstavnici Saveza uključe u izradu Nacrta zakona o koncesijama.**

4. Inicijativa HDZ-a BiH (Gradski odbor Tuzla)

Hamdo Ejubović je istakao da je neobično da se neka politička partija obraća Savezu kao što je ovdje konkretno slučaj. Otvorio je raspravu i pozvao članove Predsjedništva da daju svoje mišljenje o ovoj tački dnevnog reda.

Ivan Vukadin je naglasio da je ovo drugi put da se ova inicijativa dostavlja Savezu, i da se Savez prvi puta oglasio nenadležnim. Istakao je da su ga zvale kolege iz HDZ-a Tuzla, u vezi sa

dotatnim materijalima za ovu tačku. Predložio je da se da prilika podnosiocima inicijative da dođu na narednu sjednicu Predsjedništva Saveza i da iznesu svoje argumente. Podsjetio je da je Predsjedništvo Saveza u prošlom sazivu ocijenilo da nije nadležno da raspravlja o inicijativi za ukidanje kantona koju je pokrenuo Jasmin Imamović, gradonačelnik Grada Tuzla, te istakao da smatra da se i ova inicijativa Gradskog odbora HDZ-a BiH Tuzla treba uvrstiti u dnevni red sjednice Predsjedništva Saveza, ne smatrajući pri tom da trebamo biti sudije ili arbitri.

Muhamed Ramović je istakao da se može apelovati na brže donošenje Statuta Grada Tuzla kojim bi se regulisala potrebna materija.

Hamdo Ejubović je predložio zaključak da se uputi dopis Gradu Tuzla (gradonačelniku i predsjedavajućem gradskog vijeća) u kojem će se navesti da je Savez dobio pismo čiji nas je sadržaj iznenadio i da tražimo da se u procese izbora članova savjeta mjesnih zajednica na području Grada Tuzla ugrade demokratski principi (provodeći legalne izbore prilikom njihovog izbora).

Tajib Muminović je istakao da ne treba ulaziti u suštinu oko toga da li je povrijeđen član 28. Zakona o principima lokalne samouprave u Federaciji BiH, kako je navedeno u dopisu podnosioca inicijative, nego da je ovdje stvar u tome što HDZ BiH (Gradski odbor Tuzla) nije zadovoljan brojem dobijenih mandata u savjetima mjesnih zajednica.

Nakon rasprave o ovoj tački, Predsjedništvo Saveza je, uz jedan glas „suzdržan“, usvojilo sljedeći zaključak:

Na iduću sjednicu Predsjedništva Saveza pozvati podnosioca ove inicijative - predsjednika Gradskog odbora Tuzla HDZ-a BiH, gradonačelnika Grada Tuzla i predsjedavajućeg gradskog vijeća Grada Tuzla.

5. Informacije:

5.1.a) Informacija sa 23. redovne sjednice Predstavničkog doma Parlamenta Federacije BiH

5.1.b) Informacija sa nastavka 21. redovne i sa 13. vanredne sjednice Doma naroda Parlamenta Federacije BiH

Zlata Turkić je izvijestila o održanoj 23. redovnoj sjednici Predstavničkog doma Parlamenta Federacije BiH ističući da Savez nije bio zadovoljan predloženim Prijedlogom zakona o fondu za

zaštitu okoliša i energetska efikasnost Federacije BiH, te da isti nije usvojen.

Predsjedništvo Saveza je primilo k znanju ovu informaciju.

Zlata Turkić je informisala i o održanom nastavku 21. redovne i 13. vanrednoj sjednici Doma naroda Parlamenta Federacije BiH gdje su, između ostalog, razmatrani Nacrt zakona o porezu na dogodak i Nacrt zakona o doprinosima. Naglasila je da je Dom naroda Parlamenta Federacije BiH prihvatio Nacrt zakona o porezu na dohodak i Nacrt zakona o doprinosima, te je zadužio Vladu Federacije BiH da, na osnovu člana 34. Stav 4. Zakona o principima lokalne samouprave u Federaciji BiH, pribavi mišljenje Saveza općina i gradova Federacije BiH o nacrtima ovih zakona.

Predsjedništvo Saveza je primilo k znanju ovu informaciju.

5.2. Informacija o projektima UNDP-a na kojima je Savez partner

5.2.a) Informacija o Projektu integriranog lokalnog razvoja III – ILDP

5.2.b) Informacija o Projektu RELOAD

Šejla Hasić je naglasila da Savez već dugo saraduje sa UNDP-om na provedbi različitih projekata. Informisala je da su predstavnici Saveza općina i gradova Federacije BiH 13.09.2017. godine održali sastanak sa predstavnicima ILDP Projekta o nastavku saradnje i partnerstva u trećoj fazi ILDP Projekta (faza konsolidacije) koja će trajati do 2021. godine. Istakla je da su na sastanku dogovoreni naredni koraci i nastavak saradnje, kao i okvirne aktivnosti, a koje će se fokusirati na ažuriranje baze podataka o statusu strateško planske dokumentacije u jedinicama lokalne samouprave u Federaciji BiH, ažuriranju baze podataka dostupnih sredstava podrške za jedinice lokalne samouprave od strane viših nivoa vlasti, uspostavljanju mreže (zajednice) praktičara iz oblasti strateškog planiranja, organizacije i uvođenju novih obuka za izabrane zvaničnike, kao i drugih aktivnosti relevantnih za jedinice lokalne samouprave.

Predsjedništvo Saveza je primilo k znanju ovu informaciju.

Šejla Hasić je takođe informisala o Projektu RELOAD (Jačanje lokalne demokratije) ističući da je Savez od samog početka implementacije LOD projekta aktivan partner i učesnik u svim njegovim fazama. Navela je da je u proteklom fazama Savez organizovao niz informativnih sastanaka, savjetovanja, izradu analiza, uključivanje viših nivoa vlasti, kao i drugih aktivnosti vezanih za uspostavljanje i širenje LOD Metodologije kao transparentnog načina dodjele sredstava organizacijama civilnog društva. Istakla je da će se Savez u narednom periodu fokusirati na daljnje pružanje podrške horizontalnoj i vertikalnoj integraciji i implementaciji LOD Metodologije.

Predsjedništvo Saveza je primilo k znanju ovu informaciju.

5.2.c) Informacija o Projektu „Jačanje uloge mjesnih zajednica u BiH“

Majda Ganibegović je istakla da su u Projekat „Jačanje uloge mjesnih zajednica u BiH“ uključene 24 jedinice lokalne samouprave. Naglasila je da se projekat provodi tri godine i da je uspostavljena web stranica čija je domena mjesnazajednica.ba, te da se tu mogu naći sve potrebne informacije. Takođe je naglasila da je Savez jedan od članova projektnog odbora.

Faris Hasanbegović, kao načelnik Općine Sanski Most koja je uključena u projekat, je naveo da je u pitanju jedan veoma zanimljiv projekat i da ga treba podržati.

Vesna Travljanin je naglasila da je Savez bio uključen u sve faze ovog projekta kroz učešće u projektnom odboru, te je postavila pitanje da li bi ubuduće Savez mogao biti uključen kao implementator.

Majda Ganibegović je naglasila da su u toku aktivnosti na izradi „Plana za zastupanje“ što znači da postoji mogućnost da Savez bude uključen.

Predsjedništvo Saveza je primilo k znanju ovu informaciju. Power point prezentacija „Projektni sažetak i prezentacija MZ webplatforme“ čini sastavni dio zapisnika.

5.3. Informacija o Nacrtu izvještaja za Bosnu i Hercegovinu - Pregled sektora upravljanja čvrstim otpadom i Preporuke o reformi sektora i ulaganjima u sektor

Amir Kupusija je informisao da je 18.09.2017. godine tim Svjetske banke prezentirao predstavnicima Komisije Saveza za imovinska pitanja, prostorno uređenje, stambeno-komunalne djelatnosti i zaštitu životnog okoliša Nacrt izvještaja za Bosnu i Hercegovinu - Pregled sektora upravljanja čvrstim otpadom i Preporuke o reformi sektora i ulaganjima u sektor. Naglasio je da su predstavnici Svjetske banke upoznati sa problemima lokalnih zajednica po pitanju čvrstog otpada, te da se najviše raspravljalo o predloženom konceptu uvođenja regionalnog sistema prikupljanja otpada, regionalnom konceptu odlaganja otpada, vršenju naplate usluge prikupljanja, odvoza i odlaganja otpada od strane općine umjesto komunalnog preduzeća, kako je to do sada bila praksa, redovno vršenje procjene efikasnosti rada komunalnih preduzeća, povećanje cijene usluge.

Istakao je da je zaključak ovog sastanka bio da lokalne zajednice nisu bile dovoljno uključene u aktivnosti pripreme Studije reforme sektora zbrinjavanja čvrstog otpada, da su neki prijedlozi neprihvatljivi u sadašnjoj formi i da je potrebno održati širu raspravu sa općinama/gradovima koji

su i vlasnici komunalnih preduzeća.

Hamdo Ejubović je istakao da je ovo veoma bitno pitanje.

Edin Hozan je naglasio da je općinama potrebna finansijska pomoć za ove aktivnosti, te da je veoma teško stanje u oblasti komunalnog otpada.

Nermin Mandra se složio da su potrebna finansijska sredstva, a ne izvještaji, studije i analize.

Vesna Travljanin je istakla da je Svjetska banka od nas tražila mišljenje, a da su jedinice lokalne samouprave isključene iz projekta.

Predsjedništvo Saveza je primilo k znanju ovu informaciju i zaključilo je da ne može dati svoj stav o Studiji reforme sektora zbrinjavanja čvrstog otpada (koja čini sastavni dio zapisnika), zbog obimnosti materijala, te da je potrebno osigurati stručnu pomoć u vezi sa ovim pitanjem.

5.4. Informacija o Projektu „Uspostava opservatorija za decentralizaciju u regionu“

Amir Kupusija je izvijestio da je Savez učestvovao na prvoj radionici “Uspostavljanje i operacionalizacija opservatorija za decentralizaciju u regionu”, održanoj 12. i 13. septembra 2017. godine na Jahorini. Naglasio je da se ove aktivnosti sprovode u organizaciji Misije OSCE-a u Bosni i Hercegovini i Mreže asocijacija lokalnih vlasti u jugoistočnoj Evropi (NALAS). Istakao je da je cilj uspostavljanja opservatorija izrada pokazatelja nivoa decentralizacije u zemljama regiona koji treba da pomognu lokalnim i centralnim vlastima u reformskim procesima i mjerenju uticaja na kvalitetu života građana. Takođe je naveo da je ovo prva od četiri planirane radionice, te da će u ove aktivnosti biće uključena nadležna komisija Saveza.

Edin Hozan je naveo da bi trebalo prilagoditi prevod riječi „opservatorij“.

Predsjedništvo Saveza je primilo k znanju ovu informaciju.

5.5. Informacije o porezu na dobit po jedinicama lokalne samouprave

5.6. Spisak poslanika u Parlamentu Federacije BiH iz jedinica lokalne samouprave

Vesna Travljanin je informisala da su ovi materijali već dostavljeni članovima Predsjedništva u sklopu realizacije zaključaka sa prošle sjednice Predsjedništva.

Edin Hozan je istakao da nije u redu da jedinice lokalne samouprave ne dobijaju ništa po osnovu raspodjele poreza na dobit, obzirom da se taj prihod ostvaruje u općini.

Predsjedništvo Saveza je primilo k znanju ovu informaciju, te zaključilo da se za narednu sjednicu Predsjedništva pripremi inicijativa za izmjenu zakona o porezu na dobit kojom će se tražiti da lokalne zajednice budu uključene u raspodjelu poreza na dobit.

Tekuća pitanja

Vesna Travljanin je obavijestila Predsjedništvo da je u Salzburgu održan sastanak Radne grupe za Zapadni Balkan pri Komitetu regija Evropske unije na kojem je dogovoreno da će se 25.10.2017. godine u Istočnom Sarajevu održati naredni sastanak ove Radne grupe. Naglasila je da će se Savez uključiti u ove aktivnosti sa određenim brojem načelnika, te da će Predsjedništvo dobiti sve dodatne informacije.

Vesna Travljanin je naglasila i problem naplate članskog doprinosa Saveza i istakla da je u ovoj godini procenat naplate 40%, te da opada u odnosu na prošlu godinu kada je procenat naplate članarina iznosio 60%. Istakla je da zabrinjava to što je projekat koji se već dugo očekuje u zastoju, i da iako je potpisan ugovor, još nema konkretnih informacija o početku projekta. Također je navela da su direktori oba Saveza poslali dopis donatorima projekta, te da i Predsjedništvo, ako se članovi slažu, uputi donatorima projekta dopis sa istim sadržajem. Najavila je da će tokom narednog mjeseca biti održana sjednica Nadzornog odbora Saveza.

Predsjedništvo Saveza je zaključilo da se ispred Predsjedništva Saveza uputi dopis donatorima projekta čiji se početak očekuje, a koji je poslan i od strane direktora Saveza. Takođe je usvojeno da se ispred Predsjedništva Saveza apeluje na one jedinice lokalne samouprave koje imaju dugovanja po osnovu članskog doprinosa, da ista izmire.

Zlata Turkić je predložila da Predsjedništvo Saveza ovlasti Stručnu službu Saveza da posjeti one općine koje imaju dugovanja i to uz prisustvo člana Predsjedništva Saveza sa područja kantona u kojem se nalazi jedinica/jedinice lokalne samouprave koje imaju dugovanja po osnovu članskog doprinosa.

Predsjedništvo Saveza je usvojilo ovaj prijedlog uz konstataciju da načelnici/gradonačelnici, ukoliko su u mogućnosti, budu u delegaciji Saveza prilikom posjeta tim jedinicama lokalne

samouprave.

Hamdo Ejubović je istakao da je u pitanju velika nemarnost ili loša namjera, te naglasio da se jedinicama lokalne samouprave može poslati dopis sa isticanjem problema funkcionisanja i opstojnosti Saveza zbog loše naplate članskog doprinosa.

Vesna Travljanin je pod tekućim pitanjima informisala i o inicijativi „Refresh Production“-a koju je Savezu dostavio producent Ademir Kenović. Naglasila je da je on trenutno nu putu, ali da ga možemo pozvati na narednu sjednicu Predsjedništva da predstavi film „Žaba“, te da bi bilo dobro da načelnici podrže prikazivanje ovog filma u svojim lokalnim zajednicama.

Predsjedništvo Saveza je primilo k znanju ovu informaciju.

Marin Radišić je postavio pitanje u vezi sa postupkom po tužbi Saveza protiv Federacije BiH vezano za otplatu kredita prema Međunarodnom monetarnom fondu.

Vesna Travljanin je informisala članove Predsjedništva da je u toku sjednice dobila informaciju od advokata da je pripremno ročište koje je bilo zakazano za 27.09.2017. godine, na zahtjev federalnog pravobranioca, odgođeno za 30.11.2017. godine. Zakonski zastupnik tužene strane je tražio odgodu pripremnog ročišta kako bi se očitovao o podnesku tužitelja kojim su uređeni činjenični navodi tužbe u smislu da se osporava osnovica iz koje se raspoređuju sredstva po osnovu raspodjele javnih prihoda, a ne Zakon o raspodjeli javnih prihoda u Federaciji BiH.

Nakon konstatacije da su sve tačke dnevnog reda iscrpljene, Hamdo Ejubović je zatvorio Drugu sjednicu Predsjedništva u 15 sati i 10 minuta.

Zapisnik sačinila
Selma Fišek, s.r.

Predsjednik Predsjedništva Skupštine Saveza
Hamdo Ejubović, s.r.